

四庫全書

集部

欽定四庫全書

集部

青山集卷二

詳校官庶吉士

臣初爲齡

主事

臣呂雲棟覆勘

謄錄監生

臣單可立

欽定四庫全書

集部五

提要

青山集八卷

別集類四

元

臣等謹案青山集八卷元趙文撰文字儀可

一字惟恭號青山廬陵人宋景定咸淳間嘗

冒宋姓三貢於鄉後始復本姓入太學為上

舍宋亡入閩依文天祥元兵下汀州與天祥

相失遁歸故里後為東湖書院山長選授南

雄文學其卒也程鉅夫為作誌銘見於雪樓
集劉將孫作墓表亦見於養吾集載其行履
頗詳近時顧嗣立元詩選小傳稱其入元授
清江教授而程誌實作南雄鉅夫與文交契
甚厚不容有悞疑嗣立所記乃偶然失考又
永樂大典書其名多作文字案集韻文音
義本通猶陳敷作專非有兩名也文與謝翱
王炎午同入文天祥幕府滄桑以後獨不能

深自晦匿以遲暮餘年重餐元祿出處之際
實不能無愧於諸人然其文章則時有哀江
南賦之餘音擬以古人其廣信之流亞乎文
嘗自言行事使人皆知可見者為君子之
行為文使人讀之可曉考之有證者為君子
之言今觀其詩文皆自抒胸臆絕無粉飾亦
可謂能踐其言矣焦竑國史經籍志載青山
藁三十一卷世鈔流傳今從永樂大典中裒

輯編訂勤為八卷乾隆四十六年九月恭校

上

總纂官

臣

紀昀

臣

陸錫熊

臣

孫士毅

總校

官

臣

陸

費

墀

欽定四庫全書

青山集卷一

元 趙文 撰

序

郭氏詩話序

古之為詩者率其情性之所欲言惟先王之澤在人斯人情性一出於正是則古之詩已尹吉甫自謂穆如清風蘇公自謂作此好歌當其意到語適自清自好亦不知見刪於聖人而傳於後世也夫子之於詩刪之而已

無所論說也亦間有所發明如為此詩者其知道乎孟子又申之曰故有物必有則民之秉彜也故好是懿德而詩話始此矣三百篇後建安以來稍有詩評唐益盛宋又盛詩話盛而詩愈不如古此豈詩話之罪哉先王之澤遠而人心之不古也舊見胡仔漁隱叢話雖其間不無利鈍亦觀詩之一助又有總龜俗甚黃氏玉屑最後出大抵掇漁隱之緒餘而已吾來文山日從宋李任郭友仁言詩李任集諸家之說友仁增廣而編次之凡

漁隱諸書之所已陳者一語不錄二君盛年強力使有科舉之累亦安得餘力及此噫

蕭漢傑青原樵唱序

蕭漢傑出所為詩號青原樵唱示余或曰樵者亦能詩乎余曰人人有情性則人人有詩何獨樵者彼樵者山林草野之人其形全其神不傷其歌而成聲不煩繩削而自合寬閑之野寂寞之濱清風吹衣夕陽滿地忽焉而過之偶焉而聞之往往能使人感發興起而不能已

是所以為詩之至也後之為詩者率以江湖自名江湖者富貴利達之求而饑寒之務去役役而不休者也其形不全而神傷矣而又拘拘於聲韻規規於體格雕鏤以為工幻怪以為奇詩未成而詩之天去矣是以後世之詩人不如中古之樵者漢傑自抑其詩曰樵唱樵唱詩之至也我學為樵唱而未至也雖然衡鹿守山今之樵者又誰暇唱君詩傳得無使長民者謂山中猶有不病之樵者也願君勿示鷄林賈人

陳竹性刪後贅吟序

詩之為教必悠揚諷詠乃得之非如他經可徒以訓詁為也古之學詩者必先求其聲以考其風俗本其情性後世學詩者不復知所謂聲矣而訓詁日繁去詩寔遠漢人稱說詩解人頗詩非癡物說詩者必使人悠然有得於眉睫之間乃為善爾近世橫渠以詩說詩蓋得之然不過十數章止橫渠蓋姑為之例爾竹性陳君取風雅語一用橫渠例謂之刪後贅吟余讀之毛鄭以來奇

書也釋氏之徒演說大意敷陳既竟復五七其辭謂之
偈言不必皆有韻也讀之往往能使人悟入異教自不
當與吾書並論要之教人方便是或一道吾欲取竹性
吟使童兒知習即他詩傳可束閣竹性徵余題吟後輒
用竹性例系之以吟觀詩妙處在吟哦解說紛紛意轉
訛記得富陽明月夜蓬牕閑聽竹聲歌

高敏則采詩序

宦學於靖節之鄉而采詩猶采珠於海采玉於山未有

不得者也雖然詩與珠玉異珠珠而已爾玉玉而已爾
至於詩不可以一體求采詩於彭澤而曰非靖節之詩
不采是絕天下以為無詩而亦不必采也人之生也與
天地為無窮其性情亦與天地為無窮故無地無詩無
人無詩采詩與刪詩異刪詩非夫子誰敢當之以夫子
刪詩田夫野人之作宜無足以當夫子之意吾觀於詩
而後知夫子之大也方其觀於風也不知其有雅也及
其觀於雅也不知其有頌也歌二南春風醇酎之濃郁

也歌邶鄘鴈烟蛩雨之淒斷也歌王如故家器物雖敝
壞零落而典刑尚存見之能使人感傷也歌鄭衛陳如
行幽遠閒曠采蘭拾翠閑情動盪而禮防終可畏也歌
齊秦如與山東大猾關西壯士語獵心劍氣不覺飛動
也歌唐如聽老人大父相與感額而談往事也歌魏曹
鄣如楚舞短袖雖欲回旋曲折而不可得也歌幽如行
阡陌間所見無非耘夫桑女亦不知世有長安狹斜也
吾以是知夫子之大也故采詩者眼力高而後去取嚴

心胷闊而後包括大今之所謂采詩者大抵以一人之目力一人之心胷而論天下之詩要其所得一人之詩而已矣而況或怖於名高或貪於小利則私意顛倒非詩道直市道而已高敏則兄弟俱從吾學信則今直永新州學而敏則彭澤二高俱有詩聲而敏則琴又清熟如其詩自負其才嘗一筆萬言浩然有主父西遊意是將有意乎天下之詩者豈獨彭澤而已哉故余為之序以壯其行

曲江士友送陳定叟詩序

陳定叟年十四五時以蜀亂從其家尊新會公辟地江南又二十年又亂定叟失所怙然奉其母為廬陵永和窮人若是乎命之不淑而值乎此時也定叟有妹適蜀士樂士登甲戌第矣死曲江寡妹窮無所依太夫人日夜念其女甚定叟徒步曲江省其妹值兵方入南山山谷又時時聚嘯定叟崎嶇其間得不死抵曲江挈其妹及其孤以歸計其宛轉兵盜間視去時之苦復何可

勝言歸而時方艱食米直視常時頓增定叟食指亦頓增而定叟處之裕如想見定叟歸時母子兄弟相持一慟當何如顧骨肉滿前世間之樂何以代此即定叟貧日不能再上食太夫人亦必欣然安之杜少陵有妹鍾離良人早歿諸孤癡事正與定叟同然少陵念其妹欲往不能正以南國擾擾旌旗之故定叟之所為賢於少陵多矣兄弟急難相拯自分內事何足為難然今之人兄弟平居相與非有定叟崎嶇道路之難也而或泛泛

如尋常以傷其親心者甚衆於是定叟果難矣定叟之歸也南方士友無不為詩送之人心天理之同於此可見吾於定叟之事亦喜為人誦之非為定叟難之也悲定叟能為其難而世之不能為其易者衆也

王奕詩序

世謂詩能窮人歐公謂詩非能窮人詩必窮者而後工陳無已謂詩能達人皆未必然也詩者天之所以私窮人使之有以通其窮者也孟郊賈島世所謂羈窮之極

者使天不與之以清才而能為詩亦甚矣宰物輕與人
以富貴重與人以清才委巷之人崛起而有千金跨大
馬稱達官所在時時有之至於能詩之士曠數十年而
不一遇也豈非天之所靳在此而不在彼歟吾友王奕
亦大苦學而蕭然一寒人皆謂亦大詩窮吾謂亦大不
窮亦大貧耳亦大何窮哉衡門之下可以棲遲泌之洋
洋可以樂饑吾窮居每諷此詩充然不見吾為不足而
況能為此詩者乎富者踞桮終日焦然棲船戶馬之應

酬前者在庭而後者在戶雖有高臺曲池撞鐘舞女將
不暇樂貴者縻組而入佩玦而出率以為常其得志者
乘堅驅肥於黃河莽蒼之外風沙雨雪新知邂逅立馬
而語寒酌酒以相煦而吾亦大脩然溪水之上雲煙竹
樹莎蟲水鳥與凡盛衰反復可悲可愕之事皆取之以
為詩豈不浩然於天地間而得其所以為亦大哉吾貧
甚似亦大而亦有吟癖每苦吟得句欣然滿意未知世
間富貴者之樂與我得句時何似雖持此今世誰售而

來者誰傳然人生貴適意耳使吾吟常得句即常適意
即雖富貴亦不過如此矣正恐富者之顰蹙更甚吾苦
吟時也嗟夫吾言過矣亦惟亦大而後可以聞此言也

李叔登詩序

謝公問子弟詩中何句最佳過稱昔我往矣楊柳依依
今我來思雨雪霏霏以對謝公乃獨愛許謨定命遠猷
辰告今之談詩者豈以謝公之說為然哉要之詩六義
異今人所喜獨在風比興爾大率前輩尚渾含後生喜

流麗宜謝公所賞與過輩異也余與叔登俱客厯塘之上叔登典則士間相從倡和皆訐謨定命之作一日同挽張文翁叔登云飲仙疑旭似書學自堪傳又云遽斜庚子日適在巳辰年蓋張嗜酒而善書庚子生卒癸巳余已服其精切其後盡見叔登集如題梅間云此外有花皆長物其中分席只孤山九日云白髮欲千丈黃花又一年皆穎脫奇傑於訐謨定命之中未嘗無楊柳依依者每見國初及耆英諸老詩語皆樸茂元祐以後發

越動盪之意多而諸賢之福氣一時之世道亦不及多
矣觀叔登詩知叔登晚福未可量而世道亦或可望叔
登李氏名應楠

來清堂詩序

物之初有聲而已未名其所以聲也於是有名其所以
聲者而後謂之言而猶未有字也於是有形其所以言
者而後謂之字言與字合而文生矣文也者取言之美
者而字之者也詩也者以言之文合聲之韻而為之者

也聲而後有言言而後有字字而後有文文至於詩極
矣彼其初何以異於蟲耶蟲之聲也庸知其非言也而
不能形其所以言夫亦生且死而已矣而焉用形其所
以言哉故曰唯蟲能天吾每為文辭苦且倦甚欲休乎
未始有言之先而既已有之矣然默默終日輒不樂有
時言之而得其所欲言雖天下之樂無以過也則又笑
曰此寧非吾天耶今年春來清與吳孔瞻戴用聖諸人
遊每陰陽寒暑日星之運草木鳥獸蟲魚之感無一不

發之於詩前于後喁往復不厭歲晚筆之遂成卷帙相
視而笑亦莫知其所自來也雖其間一時之作未必盡
合然亦豈無出於吾天者姑序而藏之他日之傳與不
正未可必也

送羅山禹序

士之貧於今世不亦可笑也哉往時士拔一第難改官
又難令立賢無方用人不次版築漁釣割烹或坐致公
相即擁鉅萬連阡陌直何足道必無用如余者乃貧爾

異時吾鄉大家皆積累數世而後能有所就未有朝為
一窶人暮為萬石君若近世之易也然近世富家其驟
興崛起不出於詩書之澤不本於父祖之積雖能驟致
富强驚動閭里其子孫一落往往鞭背馬前呼辜庭下
終不若彼出於父祖之積詩書之澤者雖貧且弱猶挾
冊往教號稱人師此俗人之所詆譏姍侮而至不易得
者也印山羅氏有曰嶠山禹者與余庚午同解進士數
年來貧於賦役僕僕館四方間過余充然不見不足之

色豈非以先疇累盡去故耶昔者君家固起於儒土梗
遇雨復歸於土夫亦安知無取是梗而盛以篋衍巾以
文繡者吾友李希元作序為山禹言貧山禹未嘗言也
居今而貧吾猶笑之而況他人雖然余畸人也畸人之
言率與時左余以山禹為可笑安知山禹親戚故人知
山禹者不惻然動其心而欣然為之一援手也耶

送謝會可序

人心如畫師士自讀書為文以至功名富貴下至農工

商賈所以營其生者萬方凡出於其心之所建立者皆畫也豈必弄筆墨為戲而後謂之畫哉謝會可畫梅蘭竹石枯木草蟲山水精絕每一紙出諸公貴人爭取之然會可每不屑為人作乃獨以舉子業為童子師問之則曰彼工也此師也師孔孟之位也故吾寧忍窮而為此余曰子過矣以子之才使在科舉場屋即高科膴仕亦書生分內事今隋唐弊法廢去不用士無所發身以行其志自非老無他能如我寧當栖栖兔園急就老死

而已丈夫負其耿耿苟不忍草木俱腐則挾其所能豈不可以名一時而傳後世蓋士有足恥者而不在乎為畫師也屈哉乎會可悲哉乎吾言雖然吾與汝亦畫也吾聞畫非酒不奇且相與飲酒

送尹壽翁序

二十年前尹壽翁在場屋自能駕風鞭霆摘抉星宿即才不如壽翁亦可舉可第場屋既閉歲貢士二人非富者少者有力者不得萬無貢壽翁理士窮至此無可為

者壽翁挾雷法星書走數百里外藉是為井田取養屈
矣雖然壽翁何屈談天固儒者事況役使雷霆鬼物人
爵不可得而要爵於天自除授自遷轉其賢於求人爵
者所信多矣君號見心陰極陽生等語不足復為君道
事至於極而後見天地之心今壽翁極乎未也士不得
志於人必得志於天壽翁既畸於人宜其役雷而雷我
靈談星而星我驗將所至踏破鐵門限多得買山資亦
足了此生矣吾儒家有大雷法大星經禹抑洪水而天

下平周公驅猛獸而百姓寧孔子成春秋而亂臣賊子
懼謂非神通妙用可乎孔孟扶持世道的然識其期月
可三年成百世可知七年必為政於天下果何所見何
所據而取必歲月如此其必有術矣我亦欲行雷法談
星經顧未知天心何如爾見心嘗試以語我來

送文介山序

文介山吟愈工愈窮貌愈老老而傳客諸公間行李中
有詩數卷及古銅鑪餅所至焚香插花對之即賦所未

能忘情者攜乘雲歌薤露悲吟躑躅其鬚髮盡白對酒
浩歌雖旁觀怪驚狂起不為忤予謂介山以翁年仕宦
猶當告老而家居况客耶介山曰吾豈不欲家者顧先
廬亂後不復葺嘗春雨牀漏不可睡吾起坐吟數首滿
意甚及旦索紙書之案左缺足而地右傾手拾斷瓦支
焉筆未濡而紙已濕一笑而罷吾客外雖索然尚不至
此予聞而驚曰此非介山憂諸公責也君子之愛是人
也則必為之計久遠諸公愛介山寧當使之以七十翁

客外即夜起誰侍扶者我為諸公畫計諸賢歲以數月
俸奉介山寧不亦費酒數十斛何不各移數月酒資使
翁得結茅三間以不漏而睡且吟孔子云老者安之若
諸賢聽吾計即介山安矣然後時時小兵馳一壺問翁
安否翁龍鍾方據案苦吟聞籬根枸杞聲杖藜出問誰
何顧小孫取甕酌數過又吟翁亦時時出謝故人知
已童兒遮道迎笑問老先生不出幾日矣出安往豈非
詩家一奇事豈非今世一佳事而在諸賢直易事耳吾

於翁厚甚顧不當以貨財為禮第旦夕成翁曰安得健
步移遠梅則吾請先

送宋公路序

苟於事親從兄盡其分綜理家事有其度即道在是矣
使其父子兄弟之間未盡分而米鹽薪水一切付之不
治方贏糧負笈千里求師曰學道學道其去道也遠矣
昔者科舉命世士不得志於科舉則戚戚得志於科舉
則千里走京師試禮部試禮部而第則歸而需次及次

而迎親就養幸甚試禮部報罷則又試成均試成均不
中又戚戚而歸則是三歲之間其得安坐事親者僅一
歲止試成均而中則終歲爭名天子之學榮親之望與
思親之念常交戰於胸中脩廊夜鐸收燈掩卷敦其獨
宿不知二親千里外亦已睡否睡不念其子否蓋科舉
累人甚矣吾自甲子後十年間正苦為功名役一旦世
變蒼黃歸奉親辟地數年甫定而風木之悲不堪言矣
誠知其如此豈以十年養親之歲月而棄之於奔走乎

已矣而勿言之矣吾友宋公路自清江來從吾遊始至
一試為廬陵學諸生諸生推之郡博士甚俊異之秋風
早涼余有行役公路匆匆別余歸因為誦余疇昔之作
蓋既以自悲而且為公路賀為公路勉也無科舉之累
有讀書之閑無客外之苦有養親之樂余不得及公路
矣余不得及公路矣孟子為曹交言堯舜之道孝弟而
已矣交願留而受業於門則告以歸而求之有餘師歸
而求之求之孝弟而已公路勉之

送朱則陽序

使在前十年朱則陽何至以親喪累人哉憶吾舉庚午
進士時則陽在同升中年最少方巾廣袖俊氣溢出眉
目使禮部試士不已則陽且再試三試將不能取一第
以光榮其親耶即不幸親死營高燥送車千乘贈者脫
驂弔者挂劍何至栖栖風雨中銜袖作章默居士語耶
吾謂則陽古之孝子之葬其親也雖負土種樹不借力
於人固有親友賻贈而固辭不受者矣今予之以親喪

不能舉告人也何居則陽泣且言曰吾豈欲家於喪者
吾忍死數年惟是大事未畢顧重器必不能自舉前無
一日貴富之待而後有倉卒不測之虞葬又不容以不
亟自世變來士賤傭貴一切所需直百倍他日計今日
貧者之葬不減異時中產之費也吾終歲往教之所得
吾之所謂井田者在是俯仰衣食之餘其與存者有幾
將何以集事若是而曰必不借助於人是吾親無葬期
矣吾聞其言愴然誰非人子仁人君子豈有聞則陽之

言而不動其心者乎東坡有言心知義財難甘就貧友
乞吾於君友中貧特甚不能有以相予也敬為予言

尹公槐雲萍錄序

雲萍有錄尚矣異時東南偏仄相遭於偏仄之內其為
散難聚易南北一家天地濶遠士之交遊寢廣而散易
聚難不有以錄之再會且無足徵此尹公槐雲萍錄所
以不可無也公槐快士方浩然有功名志未知此生當
費幾錄抑吾有所謁於予子之錄也必王公大人而後

錄與古之士有王公大人求與之友而不可得者矣王公大人求書是錄而不可得而後子之錄重若徒以其王公大人也而錄之則天下士有不願與是錄者矣天下之奇士無定在翳桑餓人安知非靈輒吹篴鼓腹安知非伍子胥釣魚城下安知非韓淮陰吾懼子之未必錄也陸機入洛有刼其舟者機登航屋望之見一人踞胡牀部分羣盜機遙謂曰觀子氣貌柰何為此其人即拜且泣謂機知已機至洛薦士以其人為首後為渡江

名士與王導齊名曰戴若思者即其人也今君脫遇是
人以為幸歟以為不幸歟錄之歟否歟吾又聞太行之
陽嵩山石室之間有隱者焉君將問其姓名有不告而
去者矣若然者君又烏得而錄之

龍有章卜築序

式微旄丘諸侯寓於諸侯者為之也黃鳥我行其野昏
姻寓於昏姻者為之也諸侯失國則托於諸侯昏姻失
家則托於昏姻朋友之無所居非朋友之托而誰托乎

金定四庫全書
卷一
托之矣而未得其所安非朋友安之而誰安乎才情如
龍有章而皇皇焉一居之不可得有章之友有不得辭
其責矣世言孟嘗君好士余竊疑之馮驩彈鋏之歌無
魚則遷之幸舍而魚矣無車則遷之逮舍而車矣至無
以為家則為之不悅而卒不聞所以家之者士亦焉往
而不得車魚乎敢以此告今之為孟嘗君者

送蕭漁所序

漁有所任公漁會稽一漁而得大魚自浙河以東蒼梧

以北無不厭魚者又有大者焉陶士行漁於澤中一漁
而得龍雷雨挾之以飛又有大者焉龍伯國大人漁於
歸墟一漁而得六鰲流二山以為北極又有大者焉丈
人漁於江上一漁而得伍子胥後胥卒報強楚夫差用
之以霸又有大者焉太公漁於磻溪一漁而得文王為
周輔相以有齊國其他嚴子陵七里灘張志和西塞上
陸魯望笠澤皆以漁得高人隱士之稱以名後世其與
揭竿守鯢鮒相去無幾耳蕭振玉不知何所於漁而凡

天之二百八十三宮一千四百六十四星舉得而識其
狀貌之詳與之言言語語以知人間富貴貧賤死生禍
福之故而後隱之如任嚴張陸達之如太公望伍子胥
陶士行又遠之壽如龍伯國之人舉不能遯吾振玉之
見然則謂振玉漁于河漢而得星豈不可也吾聞河之
南有魚焉觀之以知雲雨河之北有龜焉占之以知吉
凶南斗之南有鼈焉觀之以知水是皆不足漁也天漢
起東方經箕尾謂漢津其南經傳說傳說在尾後莊周

書言傳說騎箕尾有以也振玉漁天漢而遇傳說焉為
我告之曰天下蒼生望予久矣

青山集卷一

欽定四庫全書

青山集卷二

元 趙文 撰

序

彭應叔山家大五行論序

天地之初皆水而已彼其蕩漾凝結而為山者水之滓也其曲折其高低要亦出於其勢之偶然而其實一大島也古之人生且死於其間而已矣而後之人因其高低曲折而為風水之說來者為龍盤者為穴堆者為沙

前者禽後者鬼如是而可以富如是而可以貴自有道者觀之其不猶蟻穴之盤龍岡邪俗師野巫方持羅經以論卦座言人人殊彼又惡知其說之所從始與理之所以然自彭應叔大五行論出而後推其說合於河圖洛書先天後天之數以至太玄參同醫經丹說無不脗合而羅經尊矣或曰今之求地者龍穴為急沙法次之卦座水神之說拘矣應叔又發明陰陽五行之說雖非俗巫所有母乃徒迂闊而無用乎余曰不然古稱地理

要必明其理而後可以用其術則是書者莊周所謂無用之用也應叔用針主丙午而非子午此則似不可概論子午天地之中中原得天地中氣之正子午可用東南地勢既偏故稍移丙以就之不中所以求中也南北一家求封侯富貴者相屬聞應叔名者誰不欲傳客之針法隨地勢用之可也

吳山房樂府序

觀歐晏詞知是慶厯嘉祐間人語觀周美成詞其為宣

和靖康也無疑矣聲音之為世道邪世道之為聲音邪
有不自知其然而然者矣悲夫美成號知音律者宣和
之為靖康也美成其知之乎綠蕪凋盡臺城路渭水西
風長安亂葉非佳語也憑高眺遠之餘蟹螯玉液以自
陶寫而終之曰醉翁山翁但愁斜照斂觀此詞國欲緩
亡得乎渡江後康伯可未離宣和間一種風氣君子以
是知宋之不能復中原也近世辛幼安跌蕩磊落猶有
中原豪傑之氣而江南言詞者宗美成中州言詞者宗

元遺山詞之優劣未暇論而風氣之異遂為南北強弱之占可感已玉樹後庭花盛陳亡花間麗情盛唐亡清真盛宋亡可畏哉吾友吳孔瞻所著樂府悲壯磊落得意處不減幼安遺山意者其世道之初乎天地間能言之士駸駸欲絕後此十年作樂歌告宗廟示萬世非老於文學誰宜為

高信則詩集序

孟子以固譏高子為詩而吾友信則自名其詩曰固豪

謙辭雖然固詩病也有心於為不固亦病也自三百五篇以來發乎情者流動發越誠無所底滯使無止乎禮義則情之流者將何之騷體起於南國跌宕怪神出乎風雅頌之外而其歸於忠君愛上則詩之禮義未嘗亡近世詩人高者以才氣凌駕無復細意熨貼下者纖軟稚弱固不足論工者刻削過當去情性絕遠疎者則苟簡滅裂雖律詩亦不必留意屬對矣如此而謂之不固是誠不固也令人但知律詩有律不知古詩歌行亦必

有律故散語中必間以屬對一二不然則不韻不對漂
漂何所底止又姑論用字古固不拘平仄失所即讀之
音節不合殆天籟也此語僅可私語兒孫使持語大方
家且將獻笑信則詩不失規矩繩墨而未嘗不行乎規
矩繩墨之外蓋安不弱老不疎工不刻吾為君授記君
他時當名家數正法眼藏必自三百五篇始

黃南卿齊州集序

五方嗜欲不同言語亦異惟性情越宇宙如一離騷崛

起楚湘蓋未嘗有聞於北方之學者而清聲沉着獨步
千古奇哉後來敕勒川之歌跌宕豪偉彼何所得詩法
如此吻合今采詩者遍天下吾友黃南卿歐陽良有取
四方詩刻之號齊州集抑州可齊詩不可齊詩之為物
譬之大風之吹竅穴唱于唱喁各成一音刁刁調調各
成一態皆逍遙皆天趣編詩者亦任之而已矣故是編
雖以齊州名而詩實不齊不齊所以為齊也必欲執一
人之見以律天下之詩此豈知齊者哉夫詩技也知其

說者進於道矣

贈許生序

許子織布然後衣乎曰否許子冠素自織之與曰否許子以釜甑爨以鐵耕自為之與曰否以粟易之許子不知幾世孫祥叟本刻梓又圖書又金石以刀為筆尚不甚相遠而且雷法且婦人醫且眼醫充其巧即自布自冠自釜自甑亦何所不可抑吾有憂焉巧者勞拙者逸子之能多則人之易子也多子方呼召風雷而東家以

刀筆徵方挫鍼刮膜而西家以帶下召吾懼子之皇皇
焉而不給於其事也予之為是多能也將以易粟也而
祖守其一而可以役百工予身為百工以致其一巧莫
巧於而祖矣我為子畫計反而祖之所能人不能役我
而我可以役人巧孰大焉吾言不欺子歸問之而祖

贈陳恕翁序

方陳濟庵遣恕翁從余學豈不以應舉覓科為可羨而
醫不足為哉十年來恕翁折節為醫而余恨不早從濟

庵學矣。恕翁見余嚴湖，且別徵贈言。余曰：昔者足下家君為子請字於潛齋翁。潛齋翁字子以恕。夫恕盡之矣。予何言恕之？取譬唯醫為近人。方在呻呼蠱惑之中，為其親戚者愁苦墊隘，欲代不可援。天號神靡所控告，漆漆然惟醫之是望。而世之貪醫方且風雨莫夜，辭方且責報於未試，方且先富之緩者而後貧之急者，是反其心而思之，吾一指之痛也。何若吾一椎之苦也？何若則未有不得其本心者矣。此之謂恕，此之謂求仁。莫近吾。

考史傳醫家唯南史徐文伯兄弟五世貴盛自古無比
此外大倉公無子扁鵲為李醯所殺華陀為曹操所殺
皆不聞有子能傳其業此無他倉公不肯為人治病病
家怨之扁鵲醫婦兒老人隨時變易其術以規利華陀
晚以醫為諱為曹操療頭風尚留不盡之術屢呼托妻
病不往而況他人不怨於人者天亦不怨於我理固當
然今恕翁傳其父業而又將以傳其子君父子之用心
可知矣恕翁起再拜重為告曰恕有二恕人恕也自恕

亦恕也恕人可自恕不可夫醫之難雖倉公猶自謂治病有時不能愈豈可謂倉公無不愈之病哉我不愈而人愈之必彼之術賢於我也世之有疾者亦豈肯舍能愈之人而嘗試於未可必之人哉而惰者見夫勝已者輒曰有命醫道類相醫造命者也非言命者也恕翁庭闈之講有素學問之日方長益精其所已能而求其所未至四方之欲愈疾者不歸恕翁而何歸乎

贈醫道士蕭無為序

蕭師學為醫問其號曰無為余曰傳稱晉侯疾秦伯使
醫緩為之杜預注為治也緩治則曰不可為他日秦又
使醫和視晉侯疾和亦曰不可為是古之言醫者皆曰
為令子醫也而曰無為何故無為曰吾師之言曰無為
而無不為吾以之療病可乎凡人之病皆生於為使皆
饑而食渴而飲夙而興夜而寐春夏而動作秋冬而收
藏即病安從生既不謹於為以至於病吾治其病而已
其邪也逐之其積也疏之開鬼門潔淨府是不免於為

矣雖然是所以為無為也彼不善為醫者因一歲之病而擾及他歲因一經之病而累及他經使其五歲相讎而不寧十二經十五絡擾擾焉不病於邪則病於藥茫然莫得其病之所在則又用其下品以搜求於腸胃之間若捕盜然罪人未得而良善先及當是時雖有和緩不能為也是故善醫者以無為為以無為為者非不為也為之於所當為而已矣余曰夫治天下亦若此而已矣夫子之論舜曰無為而治夫何為哉恭己正南面而

已矣夫舜豈誠木偶人而已哉病在四凶則治四凶病在三苗則治三苗是故病去而元氣不傷東漢之末病在宦官竇武何進之徒知其病之在此也而無術以去之乃召董卓以為之宦官未誅而董卓之難作遂使袁紹曹操之徒得以誅卓為名而天下大亂以至於亡庸醫之為病何以異此語有之曰病不服藥為得中醫蓋不服藥止於不為而已未若為之之害大也有病者苟不得以無為為之上醫又不如得不為之中醫無為見

黃帝而問焉黃帝亦曰無為謂是

贈無見和尚序

有目不能以無見非學道所病也見而不與之俱往又不留於心幾矣至尊從輪掌中飛一寶光阿難右而阿難右盼又放一光阿難左而阿難左盼阿難不能不隨所見而動搖而能知見性之不動其庶乎然使之見而不動則更進一步矣見之而不動謂之無見可也今夫瞑目而趺坐可以無見矣然本心不定則其擾擾乃甚

於未瞑目時寢而不寐寐而夢是豈有所見哉心而定也雖不必瞑目跌坐猶無見也是故無見易有見而無見難有見而無見易無見而無不見難蓋至於是則圓覺大智朗然獨存而見性周遍十方矣而豈易到哉觀無見秉拂北禪諸公叙詩以道其行者不少矣而無見猶介吾弟以請於予夫無見之於予未始有一日雅也而知求於予則無見必有無見之見也予未始識無見而為之言予於無見亦有無見之見也此豈他人所得

與哉後日相逢又當刮目

贈李見心序

世有所謂道法者能使雷霆鬼物其理誠有如釋氏所謂萬法由心生者人一身五臟皆有神而心為之主存吾之神雖天地可動也而況於雷霆鬼物乎夫子不語怪神世固非無怪神也聖人道其常而不語耳李見心從事雷霆諸法以濟人治鬼物靈甚私有所欲問於君造化之顯然而可畏者莫如雷霆經史所稱震夷伯廟

震武乙射天碎元祐黨碑此其尤大彰明較著者也世
或言顏魯公為神于雷蓋有是理竊疑之雷霆之擊一
樹也以其怪妖蛇虺之所伏為人害也世之為人害者
不少矣則必有為之伏也雷默然未有討焉而徒時時
小樹小蟲之是震得無舍豺狼而問狐狸乎君有職司
於雷霆者嘗試為我問之

劉肖巖觀星序

星萬八千有奇其有名可識者三百六十星何名哉後

人傳會而名之爾夫豈惟星雖天亦其初誰天之文字
展轉因天之而不可改爾今之談天者有百中經即可
言星命有排日厯即可言躔度指在天之三百六十者
以問之曰此何星也曰吾不知吾不知是何以異於不
識藥之土產真偽而用藥者哉劉肖巖能推厯又識象
其言曰吾貧不能具油甕吾夜卧而觀之其逆順進退
疾徐羸縮必與吾厯合其不合者吾雖厯不敢信而况
於市井排日者乎故吾推人命非他有謬巧大率以天

為厯以目為手而已嘗試有以問君君名肖巖肖巖事
本傳說天有傳說星說者曰傳說死而其精氣上乘箕
尾之間為是星也使是星果傳說為之則其所主當係
賢人君子之進退天下國家之治亂而特主後宮女巫
之事是何也蓋箕尾之間固有是星後人見莊周書有
傳說騎箕尾之說因以名之爾是傳說不幸為莊周寓
言受誣而反為是星借重也猶天駟之旁有王良傳舍
之旁有造父後人以其在天駟傳舍之旁有類乎御者

遂王良造父之爾何人不可相則何人非傳說使傳說之為傳說如此而已即以之主女巫而猶不足者也因君名肖巖善觀星及此

贈竹隱相士序

入與此君處出從時貴人遊其必有不可於眼者矣不可於眼而欲論其窮通天壽焉吾見其難合也抑人實異竹君毋以觀竹之眼觀人竹以清貴人濁貴竹以直貴人曲貴竹以堅勁貴人軟媚貴試以此觀萬不失

一而未知此其必然耶無肉瘦無竹俗世之知舍肉而取竹者鮮矣而王子猷獨深好之庸知今之清者直者堅勁者之不貴乎由此言之貴與否直未定也吾鄉蕭君宏叔號竹隱而善相徵予言既告以此重為告曰凡物美惡何常邕以痴為甘赤以溷為潔海上之夫以臭為芬溺於彼者深其視熊蹯豹胎金鐺玉碗與夫蘇合婆律之逆於鼻不可一朝近也君出觀時貴人熟入歸見此君得無反訝此君之不濁不曲不軟媚乎竹隱笑

曰吾與此君周旋三十年矣吾出而無所不相歸而清風拔之竹不我疑也子母間我

贈易卜尹清甫序

鍾毓不求公明筮死曰死以付天不以付君顏含不求景純作卦曰自有性命毋勞蓍龜人固各自有見顧方幽憂感懟之中安得如管郭者而問之乃聞峯塘尹清甫易卜奇驗一日邂逅金溪之上試令作卦如扁鵲見人五臟癥結如東方生射覆如佛祖通他心即管郭何

以過此余嘗謂公明景純之術得傳後世以其所驗者
多名公卿清甫下簾深山即奇驗千百誰復傳之雖清
甫不求人知然一代奇術泯焉無傳寧不可恨吾試為

卦得遯

艮下
乾上

之漸

艮下
巽上

其繇曰乾之巽亦巽之乾

君子好遯其遯于山其遯于山而升于天木氣上行進
于天門鴻趾連連得桶以遷木高而風鴻飛其翮不出
三年當有二首六身顯于天門而君亦繇之以傳乎二
首六身亥也木繫以生亥乾也故為天門木三數也故

不出三年

贈王祖文表背序

世稱莊嚴書畫者謂之表背二字不見史傳吾嘗思其義表外也背亦外也槩而言之則飾乎其外之謂也吾鄉有精是業者曰王祖文謁余曰昔吾祖吾父皆儒也吾不能世其業而業此吾羞焉余曰而何羞今天下皆表背也綴其語言而謂之文雅其衣冠而謂之士吾不知其中何如也然大者可以取卿相小者猶買田宅遺

子孫彼之表背欺人子之表背不欺欺人者猶遇若是
况不欺子持子業往必遇不疑

贈尹道士序

道士尹起莘吾友朱復古之弟子復古以琴鳴諸公間
莘學琴於復古將行來別使之琴宛然復古也琴罷與
余論丹益竒出其所為墨又竒余曰子以是為道邪昔
者而祖關令得道德五千言於老子老子非而祖師邪
余觀而祖師未始有琴與丹與墨也而焉用暨暨焉與

人偕來之衆萃曰吾師之書何所不有吾以之酬酢以之佑神將百千萬億於琴丹墨而未始有極也吾師不云乎渙兮若冰之將釋敦兮其若樸曠兮其若谷渾兮其若濁忽兮若海漂兮若無所止吾以之為琴吾鼓之而喜者娛心悲者技淚而不能止吾之琴非雍門周伯牙之琴也玄牝之門是謂天地根綿綿常存用之若勤吾以之為丹可以養生可以長年吾之丹非桑君鐵甕之丹也知其白守其黑玄之又玄衆妙之門吾得其玄

且黑者以為墨用之愈久而愈不敗吾之墨非李庭珪
潘谷之墨也且夫天地一琴也陰陽一丹也混沌一墨
也吾方養形於陰陽之丹玩心於天地之琴而寄目於
混沌之墨而子方且以絲桐為琴以金石為丹以膠煤
為墨不亦遠乎予聞其言惘然則敬以請曰以子之說
為我書之可乎道士笑曰吾不解人間書叟為我書

贈張山人管見序

以管闕天言天大而所見小也張山人談命號管見則

不然天之大小也。正使周四垂而望之，亦何足以盡之哉？
泛觀之不盡，又不若管闕之精，七政之行度，必窺之以
孔徑一寸之衡，太陽之精，必取之以中凹之鏡，泛然而
求之，不得也。北人看書，如顯處視月，廣而難周；南人學
問，如牖中窺日，寡而易覈。此致一說也。吾所見談命多
矣。今日見張山人說林開數專論所歸奇中要之造化
之大精於其一，可以窺之。若汗漫而求之，滋不合爾。故
管見致一之謂，非見小之謂也。山人喜吾命有歸風濤。

如此欲何歸乎

贈文一志兄弟序

文堂同知慨然語其友曰太師公粥田教子而吾不能以有餘之入為子擇師吾辱太師將以幣約余教其子會余已與故人約不可負則走百里謝文堂二子真字一志寧字紹志各出所業示余余既和其詩嘉其所已能而勉其所未至二子復請不已重為告曰昔明皇問曹霸卿畫馬誰師對曰廐馬萬足皆臣之師今子讀書

為文天地間道理誰非子之師者而况六經行世如日
在天有目者皆可睹子義理師三百以後騷選陶謝韋
柳李杜蘇黃二陳子詩師晉唐以來帖子字師而况太
師丞相之遺訓宣慰公與而翁之教詔子之師亦多矣
子勉之而已矣孟子曰人樂有賢父兄也單門晚出矻
矻自奮聲譽難起子之聞見多移養別交遊廣視單門
晚出難易萬萬子勉之哉學患無天資而子有其資矣

贈劉雲山序

山之蒸氣其名爲雲雲之態不知其幾千萬也雲出於山雲起而山隱焉雲去而山之爲山者自若雲動也山靜也動者變靜者常此雲之所以斯須而山之所以壽歟人之遊乎世其何往而非雲乎出沒於是非利害得喪之中而不失其山之體者鮮矣劉西龍號雲山科舉士科舉罷飄飄然挾甘石書以遊吾黨之士莫不屈之而西龍油然不見有隕穫意其雲其心者歟雲之變未有已向也士令也術雲也今也術後也侯亦雲也西龍

得吾言其亦自重矣乎母失其所以為山者

贈劉玉衡序

昔者嘗疑舜之正天文之器曰璿璣玉衡而北斗魁杓亦曰璿璣玉衡不識舜之名器有取於斗歟抑斗之名有取於舜之器也夫斗則安能自名謂之斗謂之魁杓以至謂之星皆人名之也意者後之人見是七星者運乎天中以建四時而均五行有類乎璿璣者而以是名之與然以後世之侈所謂渾天儀者不過以銅為之而

舜以徑八尺周二丈五尺之璣長八尺孔徑一寸之衡
皆以玉焉為之吾又疑璿玉之未必果璿玉也若寶龜
然亦珍重其事而名之爾安成劉君談天號玉衡數年
來士多去談天談天正儒者事然而俯仰今昔不能無
慨焉然於中則不得其平不得其平則不可以為衡不
可以為衡則不可以窺天劉君每對余談夙昔容色充
然而無不足其得其平者與玉衡將行湘來別余酌而
祝之曰吾聞九州之星土荊州屬衡子以衡遊荆楚之

間其必有合也以是為子賀又酌曰吾聞玉衡主燕子
是行其由荆而燕且大有合敢不重賀又酌曰吾聞春
秋元命苞言玉衡得萬人壽余泥塗之老人也敢不自
賀酌而飲余

曾一山修屋序

曾子居武城有寇至則去諸曰無寓人於我室毀傷其
薪木寇退則曰修我牆屋我將反賢哉武城大夫令人
處患難方謀身謀家不暇視蕭然一士去來何與人事

甚者且怒其警則去安則復矣而曾子自去自來之間
乃更以薪木牆屋累人雖其弟子且有所不安於心而
武城之大夫安之忠之敬之久而不變其不謂賢哉吾
友曾一山辟地上城上城諸公推屋以居之一山居上
城警則去安則復諸公油然無異辭人嘗言古今人懸
絕如一山祖孫武城上城之事殆如出一人同一時武
城之大夫安得獨賢於前也抑吾嘗過一山矣四壁如
敗堠仰而瓦隙可以觀星俯而青青之滿地者皆榆也

余謂一山此豈可以責諸公哉是亦一山有罪焉古人處客館一日必葺去之日如始至君家一唯翁之居武城也而一唯翁室曰我室牆屋曰我牆屋夫豈不安其分而我他人之物者其在我也推之以及人其在人也視之如我忠恕之學正如此爾今君居敝甚君誠安之獨不為惡少之騎屋慮乎夫諸公惟未之知爾君何不告於諸公修我牆屋諸公或相工或共費誰為君愛力又豈惟諸公將自諸公之外凡為一山故人與不識一

山而知一山者誰獨無武城大夫之心而君乃若是乎
愛於一言也吾嘗謂士之處世得其時則屋天下之人
而不難不得其時則雖以一巢累人聖賢或為之寧能
翹翹脩脩於風雨中而不為桑土計邪於是一山忻然
笑曰子試書其說以遺我

曾秀峯建祠序

嗚呼諸公言曾秀峯之痛亦有知余之痛者哉始余與
亦周從丞相於延平也至小篋簪而病病且死丞相聞

即遣吏迎余至則與秀峯同館居數日亦周竟死秀峯
卜葬亦周水南鳳山既葬從丞相出汀丞相嚴事秀峯
未嘗以錢穀甲兵事累秀峰丞相以師道尊秀峰不敢
吏秀峯也丙子冬汀四境急明年春益急丞相夜與客
語必至夜分嘗曰各歸亦不能寐曷若相與更共語一
餉然余時尚病不堪久坐輒白丞相去正月十一日早
余病卧尚未起同館者余管轄亟扣門報丞相已去余
高卧不之信曰我夜者方從丞相處歸寧有此雖軍事

嚴密丞相忍不語病客棄之去邪余管轄不能待徑去
余逡巡起視之屋蕭然無人余所傭二兵亦去矣出門
門外軍過者如織余不知所為徒步隨行軍後冀追丞
相追丞相不及行至夜甚黑止野田中時微雨夜寒哭
聲四起蓋走者骨肉多相失又行兩日乃及丞相於吳
家坊丞相一見問余曾見曾先生否余曰未也丞相驚
曰曾先生其不免乎蓋十二日四更丞相得黃招撫報
近關已破丞相亟請招撫議事使者曰招撫已行三十

里矣故丞相亦猝猝行不及相聞爾然近關實未破丞相發吳家坊如漳州余以病行三日夜憊甚不復能從與丞相訣留吳家坊不自意得不死又從黃招撫出汀遂得以喪弟告吾父相持慟絕不復聞秀峰動靜秀峰之死其在於蒼黃出汀時乎悲夫秀峰吾同舍實前輩秀峰葬我弟我乃不知秀峯死秀峰已矣無後矣不祀矣後之祀之豈獨其宗人親戚是望朋友有責焉聞有秀峰三從姪曾觀復慨然有意建祠又合秀峰師友巽

翁文山祠之誰不興起感動雖貧如起者猶將操畚鍤
自編於役夫而況不為起者乎三賢合祠示子孫也而
並使來者尚見是鄉道德文章忠孝之盛其賢於尋常
土木偶萬萬也觀復其以告於凡私淑於巽齋者凡為
秀峰故人者聞文山之風者觀復母獨為君子



青山集卷二

欽定四庫全書

集部

青山集卷三
四

詳校官庶吉士_臣初喬齡

主事_臣呂雲棟覆勘

謄錄舉人_臣黃道斐

欽定四庫全書

青山集卷三

元 趙文 撰

記

此心堂記

自有天地而此心行乎其間矣傳有之人者天地之心
均謂之人則人人皆天地之心自羲農黃帝堯舜以來
所謂開物成務所謂位天地育萬物人人皆當視之爲
已分內事顧用之有大小爾吾鄉鍾君瑞伯醫士名其

堂曰此心瑞伯此心即自有天地以來此心書曰欲並
生哉天地間有一人焉不得其生於我心有戚戚焉古
之聖賢所以皇皇汲汲爲斯人計者凡以自盡其心而
非爲他人計也充此心也以爲醫即何暮夜風雪之敢
辭何金錢豐約之敢較瑞伯挈此心以名堂天之明命
粲然心目之間所以發深省者多矣自古聖賢之經世
皆醫也堯之世患在洪水禹醫之夏商之季患在無君
湯武醫之周成王之時患在戎狄猛獸周公醫之春秋

之患在亂臣賊子孔子醫之戰國之患在楊墨孟子醫之皆此心也自漢唐以後雖號爲賢君相者亦不過隨證施治以偷目前之安而千百年長治之計莫之省憂此心不盡者多矣吾爲瑞伯記此心亶亶及此欲君知此心之體之大益充而盡之也吾老矣所謂聖賢經世之事無復夢見矣顧自少時亦嘗有志於岐黃之書而未得其說旦夕當升瑞伯之堂叩心法焉故樂爲之記

約心堂記

彭君秉周取昌黎復志賦語名其讀書之所曰約心余問於秉周曰子知昌黎復志賦之所由作乎子樂甚昌黎何能及也秉周末達余曰復志賦之作也昌黎從隴西公於宣武意必有不得以行其志者故其爲此賦自述平生嶽嶽歷落無所不至其詞大槩嫉貪佞之汙濁懲此志之不修而曰苟不內得其如斯兮孰有不食而高翔吾然後知昌黎之所謂約心也君子讀書爲士莫不各有一初心自古聖賢出處此身可困可厄而不可

以負吾心之約負約於人猶曰不信吾與吾心言矣能
愛富貴而食言乎雖然一行作吏不得以如其約者多
矣異時入幕視案牘引筆據理可否銜袖進大吏不可
其意不得不小回互意終日鬱然不樂遇事欲慷慨論
列顧孺人稚子咿嚶涕泣止雖守道君子不以勢權私
昵動其心然而不得以如其約者多矣蓋雖倔强如退
之所謂不食高翔亦何嘗盡行其志仕宦累人從古則
然而況吾世今吾秉周幸脫科舉之累而無仕宦之意

堂有可事之親案有可讀之書浩然俯仰豈不可以得君之初心故曰君樂甚昌黎何能及也君讀書為士之初所以與此心約者何事豈非欲為聖為賢豈非欲窮則獨善其身達則兼善天下今雖未得以遂兼善之願豈不可以如獨善之約願君夙夜無負斯約也與心約而負之對鏡窺影必有醜然于其面目者此即我心之責也今世纍纍若若決非我與秉周所可徒手得幸而得之必有負其初心者故不為秉周願之也秉周起謝

曰如約遂書以爲記

復初堂記

人以生爲初天地以開闢爲初吾言初異也昔者混沌之未始有一物也天地而既開闢矣然後人與鳥獸草木生焉於是有范金合土鑿泉竅穴刊山墾田築城浚隍而又窺以渾儀算以巧歷腥以殺伐辱以偃溲日中之火月中之水靡不智取力索斲樸破園乃毒其天斲荒鑄頑朴畧不還而天地爛漫矣爛漫之極而天地精英

之氣衰耗而無餘其所鍾日日趨於焦僥天闕然後山
傾海運日埋星沉而向之五伯七雄之所爭伯夷季札
之所讓一皆漸泯滅沒化為黃流蓋自是息之以至所不
知何年之久是爲天地之復初迨夫其氣休息之久盤
礴鬱積不能以不發泄則又一開闢如羲農黃帝出焉
者是乃天地憂患之始而非初也人之未生也所謂性
者與一氣同遊於渾淪亭毒之表耳目口鼻四肢且不
知其何所寄也夫焉有所欲俄而有生矣生者賦性之

始也耳而聲目而色口而味鼻而臭四支而安佚而去
未生之初遠矣然後有得則喜失則悲以至於相靡以
力相戲以智而去生之初又遠矣人能返觀內照以游
乎未始有生之初然後知血肉之身固未始有一物也
則亦可以蕭然於事物之外而得吾之所謂性者矣此
之謂復初劉君明國名其堂曰復初而求記於余明國
嘗有聞於吾書之外者故樂以斯言就正焉

青溪書院記

將為感今懷古而泄其憤懣則必之乎故都廢苑興亡
百戰之場此豪傑之士不得志之人悲歌慷慨者之所
快也至於立德立言以俟久遠則必之乎窮林邃谷清
泉白石娛憂舒悲之地則好脩之士成德之人安時處
順者之所樂也傳有之知者樂水仁者樂山心之與境
自有不相謀而相契者豈知者必惡山而仁者必惡水
哉金陵為六朝廢興之海古今詞人賦客於此寄懷古
之感者多矣青溪發鍾山而接秦淮綿亘十餘里溫太

真庾元規諸賢之所遊覽者也又有齊高帝之舊宮江
總之故宅張麗華孔貴嬪之陳迹荒煙野草寒水落日
孰非可賦謂豪傑之士不得志之人悲歌慷慨者之快
非與吾友國錄陳君生長是溪之上世亂以來四方之
迹何所蔑有未老倦遊睠焉是溪將歸而誅茅溪上讀
書其間爲佚老計而求余文以爲記余謂國錄當盛年
以文章魁別頭祈嚮何許遭時如此古今興亡之感可
爲流涕者徃徃身親見之至於緣崖蹈海幽憂沈痛終

古無有杜牧之劉夢得金陵懷古不足言也君之讀書
於是溪也能無慨然乎抑所貴於讀書者以義理之榮
敵外物之感也大莫大於天下其興廢成敗皆外物爾
而況今之所謂科第者哉而況今之所謂貴富者哉若
感慨之心不除終不可以讀天下之書窮天下之理異
時縱有成立亦不過功名之士與聖賢所處天地懸絕
國錄不可以不之思也國錄試以是思之則青溪之爲
青溪無往非世道間外物之去來正自何足介意國錄

名黃裳吾弟宗彊同年進士

虛室記

有一比丘名曰志一而號虛室作禮青山請山受記山
言汝室何處若在虛空虛即非虛既言虛者不涉名義
著一虛字即是實相何況以室而來說虛室言我此虛
室指我此心實無有室山言汝心何處室既無對山即
爲設方便法門比丘汝住何山室言我所住處名武功
山其山綿亘跨古潭表可八百里我於山中結草爲菴

今後增修作大寶刹汝刹何處云在山上汝山何處云
在虛空虛空何處室言虛無邊際安得有處汝知虛空
無有邊際云何將空來說汝心汝從卓菴以至建刹不
論大小其室皆有四維上下汝今將室來說汝心則汝
此心亦應有此室言我心豈有東西南北上下山言汝
知此心無有東西南北上下則知此心非一室比虛空
無盡世界無盡當知汝心亦復如是汝此幻身從無得
有如虛中山如山上刹而汝元心本無住着若言此心

有住着相即同剎中百種莊嚴龍象幡幢鐘鼓香花淪
於一物汝之此心不在身內亦不在外即虛空是不可
言虛只在室中從汝室中無非虛處室是汝身虛是汝
心室有限量虛無限量無量爲主有者爲客汝室未壞
則汝主人寄在室中汝室壞時則汝主人曾無不壞隨
汝所業即汝住處譬如窮人陷落坑塹譬如賈人移居
別所譬如富人囊橐有餘隨所住處無不快樂我今與
汝云何證知到快樂處於此比丘合手贊嘆得未曾有

山作記已重說偈言志一汝當知心非虛非室若言非
虛者將心來示我若言非室者云何生萬法名一號虛
室虛一意云何有一即非虛言虛並無一萬法歸於一
一歸於何處若知一歸處虛室字亦無虛室字既無安
用記與偈受記求記人當作如是觀

恕堂記

孔子曰能近取譬可謂仁之方也已孟子曰強恕而行
求仁莫近焉孔孟言恕如此先儒又釋之曰以己及物

仁也推已及物恕也仁聖之事恕賢之事抑聖固不待
推謂賢者必待推則亦未必盡然儒者說義太密下字
太謹尊聖人太過而自待太薄仁人心也人心未有不
仁亦豈無自然流動處而必待推乍見孺子將入井亦
豈有待于推而後能怵惕惻隱哉又豈必聖人而後能
爾哉而況夫醫者以生人為業者也人方呻吟于一榻
之上顰而望瘡者百口亟起而圖之如救焚拯溺猶懼
不及而方爲之強恕爲之近取譬而後推已以及之人

果然并亦不得謂之賢矣陳君祥甫世業儒又得禁方於其外舅傅氏遂為醫儒名其燕坐之所曰恕堂余謂恕第二念也見人之疾而為之惻然者第一念也是即所謂仁也祥甫自其第一念而充之亦不待復近取譬矣病者望君如望歲吾豈止以強恕望之祥甫哉祥甫自尊夫人存時施藥迄于今不廢吾升恕堂其伯仲怡然以春其諸少彬彬然以文皆能為儒為醫以昌其家恕之生意流動充滿如此

雲山記

雲出於山當歲旱時焦然萬生求滴潤不可得神龍出其膚寸而枯槁立起山之有是雲也非雲也雨也非雨也百萬億蒼生之命也士之行道教時也亦如此矣天地間樂莫樂於生意使天地之內無一物不遂其生於吾心亦若慊焉彼與我並生者槁乾且死而吾亦何樂於此士安得皆得卿相之位以行其志不必卿相之位而可以行志者惟醫爲然彼技之不精者吾無望其雨

也幸而精於其技有可以濟人之具而不肯少動其心
以及人則雖有此雲將焉用之劉君景雲業醫諸公多
愛景雲者景雲未嘗自表異也景雲天分高使其讀書
為儒當過人而屈之醫景雲對余時時有華元化晚年
之悔予語景雲讀書為儒將以行吾志方延聘如旱歲
龍公雨瓢西歸而辦香東至使人望君來如望歲出門
引領其雨其雨君至徐視其四大增損而雨之無不立
起雖使景雲得志為卿相於一時其樂何以過此願君

出是雲以行雨也小之可以澤一鄉大之可以澤天下
以至於君之子孫所不知何人將同此一生意未已也
因書以爲雲山記

得中齋記

中難得中於此時尤難過乎中則亢然而取忌於人不
及乎中則靡然而失其所以爲我儒者於是曰我且守
中然而如里克之中立胡廣之中庸其究歸于靡然而
已矣中難於此時尤難其隱不違親貞不絕俗不可得

而親疎者而後免於此世矣黃得中劔江佳士朋友皆稱曰心隱得中謙厚不欲自標榜也曰我實得中奈何必心隱我乃大書其齋曰得中而屬余爲之記余復于得中曰中之爲物宜若一定而不可易而又曰時中又曰執中無權猶執一是中之爲中特未定也今君之得中也何如得中曰何知許事吾平旦而起爲今人着今服命唐天食唐土露香對天已吾書教兒常飯留客茶罷清談商畧未有天地之先既有天地之後或問時事

吾不知酒取交歡不至亂性詩貴言志不必忤時或棊
或壺各取適意爭則敗興為商頑固不敢名項籍亦不
能大官貴人未嘗敢數踏其門歲時稱觥上壽為民之
禮不敢不盡吾所謂得中者如此其時耶權耶我何與
知焉吾然後知君之友稱君心隱甚當不隱則汙迹隱
則矯隱不以迹而以心斯得中矣是心隱即得中得中
即心隱也得中相視而笑莫逆于心遂書為序

太原堂記

太原堂者開禧丙寅誠齋楊文節公爲南江戴氏所書也後八十餘年其地歸于王君濟翁濟翁因舊而新之客有登斯堂而慨然太息者曰異哉太原王氏得姓之始也王爲周同姓春秋時王子成父有功因賜氏世居太原至今千有七百餘年矣當誠齋書扁時寧知今日太原之子孫得而居之哉魏起安世殿而其後得而居之者安世也桓氏作盤龍齋而其後得而居之者盤龍也事雖不可槩論而亦有適相似者可感也當其營構

之初與一時命名之意孰知有莫之爲而爲之者與乎其間雖欲不如此而不可得而世之人以爲私意小智果可以爭於定分之外豈不過哉抑自世變來往時高門大第壯麗雄偉有數十百倍於太原堂者矣忽焉過之爲蔬園爲馬廄而一時詞人墨客穹碑大字不爲野人之所橋野火之所燬者鮮矣今斯堂得歸於濟翁讀書之地亦豈非斯堂斯扁之幸哉代之廢興正自常事繇姬以來代不一姓而王氏忠厚一脉久而愈昌今濟

翁新卜於此天以一代之文人豫告其兆於八十年之前太原之子孫其能長有斯堂也必矣吾故爲君記之使太原之子孫讀書於此堂者知其非偶然之故也

平實堂記

吾少時從先友王見可客于白沙之上見可諄諄篤厚君子也又六年吾從見可之子桂龍雲叟偕試進士京師偕報罷去彼此不復相聞又二十年與雲叟相見須山下兩家長上各凋謝而雲叟亦老冉冉如余矣念二

三十年間人事盛衰反覆何可勝道而吾與雲叟故書
破硯無恙雖栖遲至此可悲可笑然更可自慰也雲叟
以其讀書之室曰平實者請余記孤生流落尚安能爲
故人作文字哉念君別久且爲君說今我旦起漱盥焚
香教兒讀書一二卷既食且茶部分僮奴灌蔬飯魚條
桑漚麻或時鄰翁野老相逢新聞舊見疊疊相勞苦退
復課兒讀書夜燈對家人談米鹽常事有酒酌一再行
不然則否顧兒童溫書讀倦既就枕無復人間得喪夢

親賓過從稱家有無酌薄厚以爲禮歲時先祀簋簠豆
籩何能一一如古鄉風節物禮意不廢而已書蠹曝之
硯滯滌之琴瑟几杖各就處所往時見道士言水銀丹
沙可用燒以爲丹又餌黃精胡麻得不死更見建竺山
大仙說西來意皆空浮渺莽終不能信戰國策所載機
謀術數或謂熟此即黃金白璧可立談致坐懶不能惟
兒時先人所受孔孟書卓卓可信未論孔孟安得無愧
吾先人與足下家君也雲叟聞吾言大喜曰君乃真平

實者樂哉平實人知平實之可厭而未知平實之可樂也願書之以爲平實堂記

至樂堂記

樂有幾人所共尊而榮焉則爲貴財有餘而衆附焉則爲富棟宇而繪焉爲宮花石而玩焉爲圃酥酪而飲饌水陸之珍而食焉則爲厚味金玉珠璣象犀翠羽以爲飾錦縠以爲服嬋娟窈眇娛心悅目則爲冶容冶容之旋折爲舞其鳴爲歌操弄絲竹則爲淫聲馳駿良蜚鷲

翰從禽於天六博角抵鬪鷄蹴踘爭勝於人以笑以嬉
若是者皆樂也南昌胡伯正名其堂曰至樂問君何樂
曰讀書教子而已嗟夫異時誰不以讀書教子爲事彼
非有所樂乎此以爲是可以一日而攫取天子之卿相
也十數年來無所事乎此矣而君方以之爲至樂不亦
異乎伯正慙然告我吾先人之於書也勤以書教我其
望我不能不如君言也自科舉罷吾以爲士無所於用
則折節改業以羞吾先人多矣今吾去城市而耕於野

而後知讀書之爲至樂也昔者吾讀書於吾父之側天下之至樂也而吾不知其樂者科舉累之也科舉罷十年吾猶不知其樂者猶有所累之也吾今而後知其爲天下之至樂也古先聖人之書至樂具是天亦哀于四方之士抱至樂之具纏於科舉之累而不得有其樂者七百年車書混同脫此桎梏士之讀書者無時文掇拾之勞無場屋得失之累心胷曠然開卷之頃聖賢之蘊天地之心軒豁呈露是日也掩書而起童子伊吾於前

聲若金石素交至門啜雙井鬪品共聽之俯仰天地之間高論六合之外其樂孰有過此吾所謂至樂也子前所陳者世俗之樂也正使得之憂亦伏焉未若吾之樂之為至也余曰美哉子之言乎請爲子書之爲記

文溪兩峯樓記

樓於萬竹之上所見無非上者而兩峯獨名焉高也高且得名宜爲物之所忌而莫能忌之人能立已於高而待物以靜物莫之爭矣當樓之未作也文溪雖有兩峯

而無所用之咸淳己巳王君希申始作樓於居之西偏以受之然後兩峯始爲斯樓用嘗試登斯樓而望之山遠而天宇寬地平而生意滿遐觀勝趣四面輻湊而所謂兩峯者東向而立與樓相宜若顧而語若俛而揖蔚然有神俊氣宜其足以都此樓之名而非他山之所得與也然君之以兩峯名斯樓也豈徒愛是峯而已哉其意蓋以自屬而且以屬其子也始希申之連舉於漕也與其伯氏希呂而兩今其子智則讀書於此也復與其

季沂則而兩山川所鍾連翩競爽殆非偶然之故二子之讀書於此樓也亦思子之先君子之所以教者乎夫山巔者爲椒督者爲岡邊者爲崖足者爲麓而何取於峯說之者曰上秀者曰峯夫人之自立要當卓然於萬物之上而後可雖然物莫切於彼此之相形獨立以爲高高易並立以爲高高難陳太丘稱元方難爲兄季方難爲弟此相高說也相高爭之似也爭於勢利則不可爭於名節道義文章則可蓋昔者首陽之山有兩峯焉

曰伯夷叔齊以名節高龍門之山有兩峰焉曰二程以道義高峨眉之山有兩峯焉曰二蘇以文章高區區愛智則兄弟願此峯如首陽如龍門如峨眉豈惟立而身抑亦光而親不是之競而他求所以相高者焉吾見其靡然沓然自同於丘垤培塿而已矣智則勉之哉人之觀子兄弟者甚於子之居是樓以觀兩峯也於是智則起再拜請書其語于壁以朝夕觀焉

浮眉樓記

吾友陳元吉僑寓劔江之客樓而名之曰浮眉蓋取簡齋詩語也元吉與簡齋俱眉人同六世祖簡齋貫洛陽解褐參大政而元吉貫金陵魁別頭登第今客此每眷然土思厚之至也蜀五十四州流落東南者何限時改月化殆將忘之君復生長東南知眉山面目何似乃能不忘其初君賢乎哉是樓內湖外江畢陳于前江外諸山隱約可見浮眉之名所爲立也君登臨是間可以讀書可以賦詩可以飲酒獨不可者古人憑高眺遠必傷

悲感慨形之歌詠今一爾即爲治世怪民王仲宣江山
信美非吾土之感使作於今將朝諝而夕替蠶叢魚鳧
知復何許杜鵑有無何與人事人生實難而焉用感慨
爲哉昔人言不朽曰立德立功立言今世何功可立惟
立德立言正屬我輩科第或偶然得之文章不可猝然
致也眉自蘇後未有以古文名世者雖簡齋功名事業
亦僅以詩傳觀君文力上接三蘇浮眉之秀於是乎在
益大其成與眉山俱傳朋友之望也元吉起拜曰唯唯

余曰未也君高才吾所敬服而求田問舍輩不能不以
傲疑元龍吾知君非傲者而處此世不可以蒙此疑也
知崇效天禮卑法地知固貴崇禮不厭卑天地之道也
君已元龍矣吾其敢復作劉元德語乎元吉起重拜曰
敢不端居深念

一樂堂記

吾年家鄒君次陳悅道故居宜黃城中亂後奉其親偕
其兄依士林以居而名其堂曰一樂屬余爲記余問於

悅道曰孟子稱君子有三樂而君一樂何也悅道曰仰不愧俯不忤吾不敢不勉而未能信也得天下英才而教育之吾方求教育於人者而能教育人乎惟父母俱存兄弟無故天之所以與我則然吾誠樂乎此而已矣余甚羨之父母俱存兄弟無故樂也居今世而有此又樂也自世變來昔者庶人之所不敢指斥租衣稅食於廣廈之內者俄而黃雲白草風沙跋涉愴心酸骨何可勝道而田野委巷之小人不得以有此樂蓋不足云矣

君於其間猶得啜菽飲水讀書絃歌如承平時雖使悅
道得志爲卿相於一時亦何以易此樂也天下之福禍
豈有定論哉方悅道登太常第歸拜堂下親賓舉酒稱
足下家君壽當此時謂書生志願粗畢然後天江夜碎
六合爲水海山震蕩仙聖播遷辛勤一第轉瞬蕉鹿家
人骨肉青燈夜雨能不慨然抑孰知向微世變悅道兄
弟宦遊東西二老人隨意就養其父母兄弟相聚之盛
決不能如今日無疑也然則悅道享今日之樂豈可更

戚戚哉吾弟亦周亦出悅道榜下而余以其時繇京庠
補成均生歸拜二親其樂不在悅道下今欲如悅道之
一日又豈可得哉悅道家君桃溪先生鄉里師表伯氏
次傳商弼與悅道同時舉于鄉當此之時而父子兄弟
以文墨相師友又可樂也

集義堂記

古者黨有庠術有序家有塾塾也者大夫致仕者之教
於家以淑其鄉之後進者也子衿刺學校廢而其詩曰

縱我不往子寧不來蓋其先生長者見青青之衿佩桃
闥於城闕閔然覩其來學于已用見諸侯之學雖廢而
是時家塾猶有存者至是而後知先王之澤遠矣四海
一家文教遠暨所在學校不廢益盛而山林僻遠又有
相帥爲書院以教鄉之子弟如富州同文書院者此三
代盛世之所有而漢唐以來之所罕見也書院當南昌
進賢臨川往來之衝實爲舊豐城之東地幽境勝於藏
修息游爲宜李肖翁得屋於鄉之故家帥同志共經營

之以爲書院凡鄉人子弟有志于學者聚而教焉又將
買田以給生徒而名其堂曰集義肖翁及其同志之士
周景純徐汝用蔡則名蔡學爲蔡學可求予文以記之
余復于肖翁曰君之爲是舉也義也未至於集義也自
吾之立身行已以至宇宙間當爲之事皆義也諸君皆
有責焉其自是一義而集之使至於不可勝用可也以
是一事爲集義未可也抑吾有憂焉科舉以取士而壞
士心者科舉利祿爲之累也學校以養士而壞士心者

學校飲食爲之爭也科舉未興士得免於利祿之累而士習猶未盡古以猶有學校也學校有田本以養士士果盡養乎否也學校設官本以教士又果有教乎否也子以爲學校之所謂教與子之書院之所謂教孰有益乎吾非以學校爲可廢也使主學校者以家塾爲心則學校之弊庶可革也書院幸而無田不以田也有田則有爭是集義者廼所以集利也士有志於讀書不待養也三代之學未嘗有田也子之欲買田也爲久遠計也

嗟夫文運之興衰其非人力之所得爲也必矣斯文未
喪諸君世有賢子孫書院必不廢也以無田之學校延
不官之師儒讀非科舉之書他日以之應選舉者所謂
風俗淳一運祚長久終必賴之嗟夫余之望於集義之
諸生也遠諸生其勉之哉

慈和堂記

彭養直兄弟居龍江之濱出共廩門之勞入有養母之
樂玉田翁名其所居之堂曰慈和取潘安仁閑居賦壽

觴舉慈顏和之語也養直之弟恢道從余遊以記請于
余余曰母未有不慈慈未有不和也抑保有是和者難
矣詩曰妻子好合如鼓瑟琴兄弟既翕和樂且湛子曰
父母其順矣乎妻子兄弟之間一不得其天而親之顏
有不和者矣爲人子者登高臨深足以危身苟訾苟笑
足以召閹一舉動言笑之不謹而親之顏有不可和者
矣而況以父母所生之體從于人苟不得其所從則爲
親羞貽親憂爲人子者可不慎諸讀潘安仁閑居賦所

以奉太夫人者何所不有板輿輕軒何所不可遊昆弟
班白兒童稚齒何者不足樂而比之匪人望塵遙拜能
不爲太夫人羞石友同歸能不貽太夫人憂不知此時
之慈顏和乎否也科廢士無可爲役煩民無所庇後生
習爲隨時知變之論不惜其身高者官下者吏得一付
身如捧毛櫟走趨庭下爲隸甘心焉辱固已甚矣一日
尻高呼暑所以貽親憂者又重可歎也養直兄弟讀書
養志以孝友聞于鄉又能因其先人之廬而葺之庶幾

肯堂者故余爲之記

野舟記

舟濟川之具也而橫野焉屈矣雖然以用言之則橫野
不得如濟川然而以用不用爲榮辱者人也若舟則用
不足爲榮而用不足爲辱夫豈惟用不足爲榮將用
之辱過於不用之辱多矣舟之涉乎江湖而遇風濤也
大者檣傾楫摧小者行乎湍瀨之間木與石鬪至於嚙
食敝壞然後補苴葺治未及休息旋復勞敝而其蕭然

於野水之外也無是患也爲舟謀者與其用於江湖而
勞乎寧其棄於野水而逸乎吾友朱成叔明敏士使其
得用豈減今世之士哉而棄於此而老於此築室永川
古城之下自號野舟余偶過之見成叔弄孫灌園余喟
然曰士不得志於世如此亦足矣因爲成叔言有用之
勞不如無用之逸以廣成叔之意成叔笑曰子言是矣
雖然用不用非吾所得爲也使其用吾得避風濤之患
也邪夫舟太用則敝久而不用亦敝我將處於有用無

用之間余然後知成叔之未易量而余言淺矣并其說書之爲記

水雲鄉記

去宜黃二十里水繇黃山發源盤折百餘里至漳溪與四山縈抱是爲橫舟譚公之藏左爲漳溪書院書院橫舟公子前武岡使君某廬墓所也墓廬則其書院何讀書橫舟公志也書院有橫舟祠前有濠樂亭橫舟公所建臨流觀魚公之精神尚往來是間山行可一里許望

青紅飛動樓觀鬱然江許者水雲鄉也鄉之門爲漳溪
又門爲江風山月入門而右爲樓俯大江是鄉多山得
江輒清曠使人意舒而樓以高故尤盡得清空之盛樓
下爲堂曰貯清下樓而右門曰振屐登山道也行倦牒
牒欲據地得擁高亭小憩又上爲一碧亭俯視士林生
意萬頃士林者譚士居焉一碧亭既據高絕天日霽清
盱山一筆出諸峯間若自靖獻以助士林之勝下山又
得息軒小憩又行得雪硤雪硤狀如舟飛瀑雨聲潺潺

聽之久但覺身在舟中也又行入尋壑涉畧約爲流觴
亭壁擁丹霞小有洞天有泉出龍口六月寒甚不可近
又東過流春亭亭壁湖水光山色融漾演迤興盡而出
西過跨碧遠園之泉由跨碧出于江又西爲濯清堂面
池月宵露曉荷氣逼人爽甚又於池外爲方臺高可數
尋外瞰脩碧漁舫上下前歌後答可吟而不可畫濯清
西偏又爲亭右上作古籀文流杯益竒視前所謂壁擁
丹霞處可俯也每禊時客衆分兩亭飛觴笑呼聲相聞

又出而西爲道院水竹幽遠逢漁樵心疑爲異人瀑聲
終夜如雨不可睡隔濯清盈盈一水間有釣臺而湖山
水木澹相輝映顧挹是所謂水雲鄉已是鄉自有宇宙
以來不過爲沮洳闡茸之區耘夫莠子躑躅其間惡知
所謂山水之勝哉橫舟老仙疇昔深嗜未及營度有寧
一丘相望邇只衣冠出游歌舞作樂遊者未必無意而
像室閒安高堂邃宇層臺累榭川谷潺湲又楚人所以
招魂之道武岡君思其所嗜於此寄無思之思豈如平

泉金谷但爲遊觀耳目之娛而已哉武岡君既專此水雲而其文墨又足以發之故爲之書武岡字公植諱某世爲宜黃人梅屋其自號云

秋界記

彭君高則扁其讀書之所曰秋界余曰秋既清矣而復界焉不已隘乎曰非敢隘也古之君子不幸而處乎濁世所以自持其身者不容不嚴不容不辨必聖如孔子公山召欲往可佛肸召欲往可見南子亦可自非聖人

遊於其間鮮有不爲所污者君子于此寧爲伯夷毋爲
柳下惠蓋過于清不失爲君子過于和流入于小人今
吾立吾身于風塵之外埃壒之表猶懼其失足焉若是
而欲和其光同其塵有長樂老而已矣此吾之所以不
容不秋界也余聞君言廩然世之不失足者鮮矣其初
以爲同流合污乃處此世之法而嘗試窺其藩久則深
入焉而去吾界遠矣高則隱居龍湖以龍湖爲未深且
密也而又過江焉蓋有意于辟世世方擾擾聲利之場

欽定四庫全書
卷三
決無爭子所者如余者無所容于斯世方將從君曠浪之野以分君一滴之秋故爲秋界記之庶幾他日遊君界中不曰不虞君之涉吾地

倦歸堂記

蕭同伯取山谷先生所賦其六世祖休亭語名其堂曰倦歸而屬予記之余問於同伯曰君倦而後歸不倦不歸也曰然君力倦耶曰吾真心倦矣余曰未也君未必倦也吾知君所以倦者方天下功名在盛時文士稍精

於其技者操數寸管欲撼場屋高科牕仕談笑攫取公
卿大夫之任數日而取償於其君何其易也自試闈長
碧苔黃冊飽銀蠹往時舉子大言斫月桂登雲梯兒童
間見問何語使人欬歔不能對武人稍誦七書挽二石
亦可希當世用天下既一英雄無用武之地陳簡故編
深藏遠屏恐人指爲可疑可怪之物酒酣扼腕援臂故
健而盃中無復蛇影矣士又何必皆工時文章駢儷拾
前人咳唾傳客諸公間或學晚唐約畧近似便足稱詩

人亦能撼動當路黃金白璧可指顧取甚者近清光被
恩寵往往而有之今奏記簡畧一善書吏可辦寒士苦
吟不滿一笑雖才兼陳阮思出鮑謝安所售之東南偏
仄然時方無事何所不可飯魚羹今荊州無劉表遼東
無公孫度蜀無嚴武出門適莽蒼豺虎塞路天下雖大
何行而可雖欲不杜門裹足自囚空山蓋不可得矣然
則君之倦而歸也天倦之也不然以君之意氣壓湖海
筆墨落儕輩非支離疏非兀者王駘非叔山無趾四方

上下談王說伯何所不可顧方嗒焉倦遊幅巾野服有
慕於休亭之歸此豈其心之所欲哉於是同伯聞吾言
大笑曰子言真能道人意子之倦毋乃亦類我乎余曰
未也天固倦君而君歸矣雖然天不倦也君見夫日乎
日之西而沒也以爲無日矣將旦時彼軋軋而東者猶
昨日也由是而觀之則自盤古開天以至于今天未始
一息倦也使天而倦吾其魚矣天下之大也人物之衆
也是蒼蒼者亦必有此同伯今日之倦歸庸知非造物

者補汝黥息汝劓而將有所用之未可知也同伯其端
居深念以待

學蛻記

嘗見丹家作蟬蛻圖繇蛻娘運九九轉而後脫殼以飛
其密改潛化不可知其所以然學之變化氣質亦猶此
矣吾夫子之聖變化氣質非有待於學然猶十年一化
而後至於從心所欲不踰矩之地況學者氣質之偏而
可無學乎學之蛻也愚蛻明柔蛻強狠悞蛻爲溫良澆

薄蛻為忠厚桀驁蛻為謙遜貪陋蛻為潔廉學之驗也
近世之學蛻異於是自屈首受書惟時文是急樸拙蛻
纖巧重滯蛻輕便鈍蛻敏直蛻佞苟能此道矣即儒蛻
官官蛻盜圭竇蛻為甲第縕袍蛻為狐貉簞瓢蛻為鐘
鼎糟糠蛻為姬姜於是平陸蛻為江海人類蛻為走飛
宗廟宮室蛻為木黍吾言蛻何限不欲言不欲言矣清
江宋君大昌名其齋曰學蛻大昌之從子季任與余友
使余記之余曰學如蛻苟卿語也其言則善其學則非

不廢其言可也學所以復性也而曰性惡禮學者之所
當先也而曰禮僞性惡禮僞尚何學此其學所以一蜩
而爲李斯與科舉累人久矣士欲舍科舉而專意義理
勢有所不能科舉義理之學兩進日有所不給四海一
科舉畢庸知非造物者爲諸賢蜩其蜩蝗之九而使之
浮游塵埃之外耶第恐學與科舉俱廢則改化其形容
以蛻於彼者更穢於蜩九爾大昌佳士其所講必有超
然俗學之外者故願以文字定交焉吾言俗矣大昌其

爲我蛻之

息庵記

胡君定甫營壽藏於永水之陽小江之上而名其庵曰
息庵蓋取莊周息我之義而屬余記之按息之義止也
亦生也止矣則何以生惟止故生也故氣之一呼一吸
謂之息是其止也乃其所以爲生也人惟過用其精神
故未白頭而已成翁不終其天年而中道夭是以老而
佚非佚也血氣之衰耳死而息非息也不得不息耳若

夫有道之士未老而佚可以無老未死而息可以無死
嘗試言之夫人之生其精神亦直幾何善養生者不必
熊經鳥伸响噓呼吸但一日之間稍息其心則神自還
氣自定縱不能修之鍊之以至於長生而其可以終其
天年而不中道夭可信不疑悲夫一世之人其所以役
其心者何時已也鷄鳴而爲利旦晝而枯亡使其神不
得寧於其宮其氣不得宿於其海蟲飛鳬鳬甘與同夢
方擾擾焉尹氏之爲僕銅臺之歌舞未終金穴之經營

未厭義和走馬倏忽百年向之擾擾竟何爲哉竟何爲
哉定甫號雲心雲固無心也卷舒變化知所止息吾知
定甫之息其心也久矣修年未半婚嫁先閑弄孫抱甥
人事畧備菟裘餘暇及此樂丘我竹我松手自封植親
賓載酒永日笑談定甫之所以息乃定甫之所以生也
在易之隨君子以嚮晦入宴息定甫以暮年處暮世有
嚮晦之義焉當此時也退而宴息云爾定甫之息當作
如是觀劉伯倫使人荷鍤語未應早計太甚定甫達士

非有世俗之嫌而吾方拳拳俾壽之祝者朋友之情也
亦定甫賢子之志也